



Prome Minister Eman contento cu Festival Dande 2014

## Coronacion di Rey y Reina di Dande 2014

A TOCA honor na Prome Minister Mike Eman pa t'e invitado pa coronacion di Festival di Rey y Reina di Dande pa 2014, kendenan a resulta den personanan di Frenk Kock y Setty Christiaans Yarzagaray. E festival a tuma lugar diasabra ultimo na Club Caiquetio cu mas o menos 40 participante compaña pa 10 agrupacion musical.

E mandatario a expresa di ta contento di por ta presente y forma parti di otro momento importante den folklore di Aruba. Prome Minister Eman a probecha di e ocasion pa recorda dos talento grandi cu a caba di bandona e mundo aki, esta Hildward Croes y Lio Booi, kendenan di nan forma a percura pa transmiti e mensahe di sentimento di 'ta Arubiano' por medio di nan inspiracion, composicionnan y musica. Dande, e mandatario a expresa, ta forma un parti importante di e tradicion di Aruba, yegando te na porta di cas di e Arubianonan riba e prome dia di aña. El a gradici Harry Croes, kende durante mas di 40 aña a mantene e folklore di Aruba bibo por medio di Festival di Dande y Festival di 18 di Maart.

Prome Minister Eman a felicita e ganadonan y tur e participantenan, kendenan di e forma aki ta duna nan contribucion pa sigui pasa e folklore aki p'e generacionnan cu ta bini. Pa finalisa Prome Minister Eman a manda deseonan di bon aña nobo pa pueblo di Aruba, un aña 2015 "cu ta prometedor, cu tur e pasonan cu nos ta bay tumando, e progreso di nos pais ta continua. Y nos comunidad hunto por celebra cada un di e momentonan di exito y triunfo di Aruba."